

摘藻堂四庫全書薈要

集部

欽定四庫全書薈要

集部

御選明詩卷一百九

詳校官原任主事臣李斯咏



欽定四庫全書薈要卷一萬八千六百九

集部

御選明詩卷一百九

七言絕句九

王世貞

見挾彈者偶作

黃衫挾彈市人看  
楊柳陰中百舌寒  
日暮建章秋色裏  
不知何處落金丸

聞子相歸不能待寄之

桐柏江頭春鴈稀故人聞向日邊歸  
扁舟欲繫遙相待  
萬戶清霜夜搗衣

弘治宮詞

南海珠池貢已稀西川又罷錦文機  
朝來御服三經澣  
賤妾寧希曳地衣

午槐圓影覆彤除今日天顏喜氣舒  
穩坐御牀無一語  
但稱難得老尚書

靜數蓮籌第五更寒鴉金井未分明  
披衣欲坐猶疑早

前殿連傳警蹕聲

急遣追鋒召外家  
南宮桃李正如霞  
自從光祿裁宣索  
長日從容且賜茶

偶成

三載寒廬夢不成  
悔將餘債伴殘生  
南樓酒力初微後  
依舊蕭蕭夜雨聲

避暑山園

殘杯移傍水邊亭  
暑氣衝人忽自醒  
最喜樹頭風定後

半池零雨半池星

登蛾眉亭有懷

回首江南黯淡雲蛾眉亭畔思紛紛何因却作姑溪水

流到長江尚不分

姑溪水流長江自為一帶

王世懋

逢友

歸來雙鬢兩蕭然見畫猶能記昔年風雨一船曾泊處  
借人燈火草堂前

謝榛

冬夜聞笛

雪後寒雲散御堤  
笛聲何處重淒淒  
北風吹折邊城柳  
人倚層樓月正西

送周秀才歸錢塘

燕京陌上送周郎  
歸到西湖春草長  
清夜開尊多舊侶  
滿船歌管月如霜

道院秋夕

秋河一帶月光團露坐空除夜欲闌却訝西樓降仙子  
玉笙吹徹萬家寒

秋懷

秋來客思渺烟波湖上看山秋更多祇恐佳人怨秋色  
晚風吹斷采菱歌

重九雨中懷弟

天空朔鴈不成行秋色年年似故鄉門掩菊花人獨卧  
冷風疎雨過重陽



即席贈薛之翰

園花尊酒日相期，共爾留連欲暮時。  
醉倚山亭歌楚調，秋螢飛過石榴枝。

暮鴉有感

來時池草吐春芽，秋水驚心落藕花。  
空記三秋故鄉夢，夕陽衰柳看歸鴉。

九日過王叔野無菊

陶潛嬾慢閉柴關，九日餐英自解顏。  
不種黃花君更嬾，

滿城秋色幾人閒

寄武當山張隱君

辭官身寄楚天涯  
石屋燒丹別是家  
七十二峯春雪裏  
杖藜隨意看梅花

晚登沁州城有感

蒼茫野色幾沙灘  
漳水東流倚堞看  
烟火滿城天向夕  
一鵬飛過不知寒

梁有譽

閨情

萬里關山無盡期  
年光春色使人悲  
柳花只似悠揚夢  
日逐東風少住時

宗臣

白雲樵者

赤城落落埽春氛  
夜夜仙人弄白雲  
雜佩幽蘭何處得  
洞庭明月問湘君

徐中行

送宗子相還廣陵二首

黃金臺下白榆秋，葉落滹沱急暝流。  
南望大江明月裏，片帆千里下揚州。

霜落江空楓葉凋，接天寒色廣陵潮。  
清宵憶爾聽鴻處，明月揚州第幾橋。

吳門送周水部謫楚二首

客歲曾聞薊北書，知君秋興在鱸魚。  
銜恩却向湘沅去，明月滄州滿謫居。

綠髯仙郎白玉羈春風曾醉習家池停車試聽襄陽曲  
半是當年水部詩

感舊

自別燕臺白日徂華陽碣石總荒蕪獨留一片西山月  
猶照當年舊酒壚

吳國倫

送子相移疾歸廣陵

淮南落日半江明江上寒潮萬里生遙夜懷人意無限

一帆秋雨傍蕪城

荅宗良

何人吹笛楚江灣  
楚客天涯逐未還  
隔水未聞楊柳曲  
梅花一夜滿西山

余曰德

送萬彥和僉憲之粵

繫馬花間挂玉鞭  
毵毵隄柳亂鳴蟬  
河梁自是銷魂地  
此日因君倍黯然

汪道貫

嶼柳

近水相將發故枝  
隔年猶自颺垂絲  
江南消息君知否  
正是鶯黃未著時

石嶺梨花

縞衣素佩儼分行  
朝露盈盈競洗裝  
賦客高堂爭得似  
遊仙宛在白雲鄉

汪道會

夢入青溪深柳中  
口吟驛樓人斷畫橋西之句  
覺而續之

草茸麥秀柳花齊  
夢逐春風到曲溪  
記得清吟何處所  
驛樓人斷畫橋西

雨後桃花

再訪仙源桃李空  
雨餘猶有兩三叢  
東風似解遊人意  
吹落殘花入酒中

張嘉盾



教山人病詩以問之

九十風光強半過  
棲遲高枕欲如何  
夜來紅雨千山落  
留得春聲杜宇多

宿太華山寺

石林橫架萬峯西  
海上雙珠入戶低  
自是山中無玉漏  
朝霞還有碧雞啼

張九一

過城南別業

樹色蟬聲雨更幽誰吹玉笛倚南樓不知天末涼風起  
怪底梧桐葉葉秋

同邵仲學李貞立登廬山絕頂

絕頂風高五月秋三臺遙對鄴城愁鄉心忽墮黃河水  
行到梨園不肯流

桃源峯

一丘一壑坐銷憂洞裏秦人半白頭四月桃花緣澗吐  
始知春向此中留

康郎山

寥落人家穴壁殘  
兩崖霜吹結飛湍  
康郎直上千尋雪  
夜半征人當月看

謝本寧餉羅

織羅一束捲春烟  
分得瀟湘半幅天  
裁就單衫歌樂府  
江南白紵是新篇

巴州驛

子規啼罷塞雲愁  
川口風烟似暮秋  
一夜雨聲千澗水

不知何處是巴州

渡江

錦浪層層曉日生  
丹楓歷歷帶霜明  
扁舟欲泊蘆花渚  
萬里西風落鴈聲

送鄧二守之鄱陽

春郊雨過綠楊齊  
客路流鶯萬樹啼  
行到南陽瞻峴首  
故園只在數峯西

再送秉器

川原花落雨初收  
二月微寒似暮秋  
把酒不成今日醉  
明朝相憶隔昭丘

莫怪離魂黯欲銷  
片帆南去九江遙  
關情最是岐亭柳  
烟鎖千條與萬條

俞允文

送吳處士

春來愁雨復愁寒  
此夕憐君各盡歡  
明日舟行三十里  
城中山色隔城看

盧枏

長春觀二首

瀛海青雲見帝丘  
玉光浮動五城樓  
茅君借我山中鶴  
飛上天門看九州

紫極清壇道士家  
閒騎白鶴弄雲霞  
蕭臺旖旎金光草  
春殿虛無玉樹花

秋興漫成

天外晴山色不移  
苑邊衰柳駐遊絲  
沙平細履無人見

恰似青春二月時

內寄衣

吳江白紵雪絲裯不惜芳春細草薰  
玉手裁縫誰得見金刀一剪斷行雲

李先芳

由商丘入永城塗中作

三月輕風麥浪生黃河岸上晚波平  
村原處處垂楊柳一路青青到永城

小亭即事

綠楊垂穗噪新鴉  
竹裏茅亭一徑斜  
不是山人攜酒至  
小園閒殺碧桃花

春望

芳草淒迷一徑斜  
澹烟疎雨噪新鴉  
城南春色濃於酒  
醉殺千林桃杏花

秋日即事

燕山落日晚淒淒  
鴻鴈初飛漢苑西  
莫戀玉河芳草色



秋風昨夜到沙堤

夜歸

一聲殘角起紅塵  
白馬青袍來去頻  
日暮九關金鎖合  
暝烟和月送歸人

早春懷元美

蘄王簫鼓日紛紛  
雪霽遙看玉筍雲  
借問江城春幾許  
梅花落盡不逢君

吳維嶽

發南豐

山程細雨桃花店關路長橋楊柳溪何事錦囊朝夕載  
南豐春色總堪題

歐大任

巴陵劉宗道自吉安與余同舟塗中言別

雨中同上吉州船分手潯陽思惘然明日思君是何處  
萬行烟樹入湘川

黎民表

豫章江行

山磴崎嶇猿夜號  
溪流如沸石如刀  
刺桐花下思歸客  
待得天明有二毛

寒鴉圖

寒山寂歷野蒼蒼  
繞樹驚飛不斷行  
畫角一聲天欲曙  
金河翻落滿城霜

寄題潘少承西樵山房

新營丹室鐵泉山  
千樹梅花不共攀  
夜夜京華成短夢

白雲紅葉屋三間

魏允中

寄鳳洲先生

傲吏風流減聽詞  
案頭終日著新詩  
錢塘江上千峯色  
准擬春來勝舊時

楚原晴望

隴頭晴雨綠如烟  
村巷家家出種田  
疑是故園三月暮  
不知身在楚城邊

沈爚

送顧梧石之衡州

瀟江路轉千峰碧  
冉冉蒼雲拂樹低  
此去臨風憶回首  
月明江上鷓鴣啼

顧聞

南歸道中二首

草長花飛客路長  
扁舟今日渡山陽  
笛聲吹落黃河月  
淮北淮南總斷腸

高天淮水澹悠悠  
南向春江日夜流  
極目烟花傷客思  
金堤明月是揚州

林垠

拒馬河作

拒馬河邊驛路長  
蜚狐口外又斜陽  
春光已過六十日  
不見花枝空斷腸

黃中

讀陳白沙詩

天風吹散鐵橋花  
白日江門卧釣槎  
欲問烟波舊消息  
藤蓑今去落誰家

陳片

秦淮烟月

秦淮烟暝水長流  
明月空懸萬古愁  
春去秋來風景別  
鳴箏夜夜酒家樓

聞笛有懷朱比部

空林寂寞雨絲絲  
折得梅花未滿枝  
正值鄰家夜吹笛

倚闌無限故人思

和寒山子詩

青烟紫霧夕冥冥似雨飛泉滿戶庭白日山人無一事  
水精簾下閱金經

王鑛

青魚灘

青魚灘上野人家曲徑疎籬長物華漠漠午烟吹不散  
鷓鴣飛出木棉花



潘德元

秋江釣者

江湖最樂是漁翁  
何地無天著釣篷  
見慣白鷗渾不避  
一絲晴颺蓼花風

馮行可

憶庭前竹

霜色遙憐修竹殘  
無人千里報平安  
東風若解相思意  
好護新枝待我看

賦得章臺柳

曾折長條贈別離  
相思偏憶去年時  
如今遙落章臺畔  
一任王孫繫馬嘶

句曲道中

句曲雲山徑路深  
千圍粉蝶隱疎林  
啼鶯不管春光盡  
啼徧花陰更柳陰

玉立亭

落日孤亭依翠微  
高僧曾此悟禪機  
浮雲猶作人間幻

一片閒隨秋鳥飛

冷泉亭

冷泉亭外石巒岼  
雨洗山根走急湍  
桂子落殘秋意老  
青松枝冷白雲寒

九里松

謾謾松風九里清  
高秋乘曉繞山行  
夜來雨過泉逾急  
瀉出泠泠石上聲

白衲菴

靈隱西邊別徑長  
泉聲竹影逗雲涼  
閒吟漸入深山去  
石笋峯頭白衲房

漾碧軒

荷風香散入蒹葭  
漾碧軒前不見花  
落日衆山青不了  
接天秋水浩無涯

南屏

寺前池水碧雲凝  
寺裏烟霞上幾層  
坐久衆山低落日  
南屏暮靄接西陵

許邦才

新添驛

野館孤燈半滅明  
江壩月落夜潮生  
無端鄉思三更後  
聽盡蕭蕭風雨聲

寄懷元美

鴻鴈驚秋海上還  
片雲孤月薊門關  
無端昨夜西窓夢  
不道千山與萬山

丁香花

蘇小西陵蹋月回香車白馬引郎來當年剩綰同心結  
此日春風為剪開

秋夕傷箏伎

鈿箏銀甲芳春後珠笈金釵明月前誰使燭灰香燼夜  
却聽風葉墮霜天

平原道中荅于鱗送別諸韻四首

神京千里促行裝一片離愁若箇長三疊陽關萬行淚  
春風處處有垂楊

櫟水橋邊柳作花紛紛  
晴雪撲行車  
花前不醉君家酒  
暮雨孤村何處賒

楊花滿路傍人飛  
正是傷離長淚揮  
三日計程三百里  
夜來魂夢尚依依

郵亭夢覺正三更  
窓上花陰轉月明  
徙倚曉鐘傳遠寺  
更無人見苦離情

送謝中丞歸射洪二首

六月江干冰雪涼  
射洪春酒鬱金香  
自從筇竹通西夏

漢使年年出夜郎

巫峽江陵一水分  
猿聲兩岸夜成羣  
遙知月下孤臣淚  
才過三聲不可聞

邵圭潔

傷春

未向春風醉一觴  
忽驚南岸柳花香  
欲從深處尋桃李  
行盡山村幾夕陽

長日攤書靜掩門  
隔窓啼鳥暗銷魂  
年年多少違心恨



欲向東君一細論

葉春及

贈玉娥

涉澗登臺髻半鬆  
玉娥相對玉娥峯  
千杯勸盡不知醉  
手挹飛泉入酒鍾

泉聲瀟瀟石粼粼  
羅襪凌波不動塵  
借問仙家誰得似  
蕊珠宮裏鮑夫人

代玉娥答

飛泉直下幾千尋  
酒落雲山紫翠深  
採得仙花羞妾面  
汲將泉水比儂心

醉歸忘却玉搔頭  
藤蔓牽衣碧澗流  
流到門前尚嗚咽  
松風蘿月兩悠悠

贈韋純顯赴泰和

書劔同遊二十年  
柳絲長綰萬條烟  
天涯落魄愁分手  
君向西江我在燕

南遊同唱郢人歌  
楚水閩山路幾何  
欲向天涯寄楊柳

只憐攀折已無多

表表

題漁梁客舍

漁梁渡頭新雨歇  
大竿嶺外飛雲沒  
遲回不見故鄉人  
却見雲間故鄉月

仲春龍

宮詞二首

海子周遭長荻芽  
春深乘艦不乘車  
阿誰貪看游魚戲

拋却新簪茉莉花

曉來別院遞笙歌  
百子池頭長綠荷  
睡起無聊庭下立  
笑拈竿子打蜂窠

吳世忠

送方二敬之北遊

新製貂裘稱體輕  
試裝寶劍已雄鳴  
黃河至後無舟渡  
獨跨驂騑冰上行

徐棉

尋隱者不遇

杖藜徐步出荒原  
漠漠寒雲掩洞門  
流水桃花人不見  
孤鶯飛過綠楊村

潘緯

過友人園題壁

垂柳柴門傍水開  
啾啾野雀啄莓苔  
園林日午花爭發  
主不歸來客自來

吳承恩

東未齋陶師

牀頭社甕鷺兒熟江口春船石首來欲就吾師謀一醉  
講壇何日杏花开

句曲

紫雲朶朶象芙蓉直上青天度遠峯知是茅君騎虎過  
石壇風亞萬株松

丘雲霄

春盡次淮上

南關何處日孤征  
歸夢先春幾百程  
今日送春猶是客  
孤城寒雨不勝情

殘花

昨日看花花滿枝  
今朝爛漫點青池  
無情莫抱東風恨  
作意開時是謝時

施漸

漫興二首

門外清渠映葛衣  
偶來觀物上漁磯  
秋風蘋末鷗驚起

始悟山人未息機

久不逢人道姓名從來愚谷寡將迎教兒莫漫除秋葉  
庭葉自深人自行

贈歐道士賣茶

靜守黃庭不煉丹因貧却得一身閒自看火候蒸茶熟  
野鹿銜筐送下山

秋日望山中寄舊僧二首

秋原落日見青山遙識僧居杳靄間指點却疑身已到



滿窓蘿葉上人間

身慵常媿扣朝鐘  
每聽楞伽是夢中  
今日別來應共笑  
猶懸舊榻待秋風

中夜有感

牽牛西轉雉樓高  
殘月亭亭午夜潮  
客久不知顏鬢改  
一聲城角起峒嶢

海上

秦山青截海門斜  
萬筏凌秋壘淺沙  
聚落蕭疎耕讀盡

潮來潮往是生涯

嚴怡

曲塘

土牆茅屋竹籬笆  
楊柳風高燕子斜  
可是曲塘人好事  
家家屋角有桃花

余承恩

荅草池約汎蓉溪

春來花鳥總關情  
夜雨愁聽不到明  
怪殺主人猶病酒

晴江鼓柁放舟行

泛舟

芙蓉溪水三尺強  
蒼蒼兩岸花草香  
若待長江新漲合  
撐舟直上小茆堂

望忠州

高江落日片帆秋  
岸上漁罾次第收  
無數峯巒雲霧裏  
舟師指點認忠州

戚繼光

督兵過潮州渡

汗血炎方七見春  
又隨殘月渡江津  
行藏莫遣沙鷗識  
一片浮雲是此身

望闕臺

十載驅馳海色寒  
孤臣於此望宸闕  
繁霜盡是心頭血  
洒向千峯木葉丹

馬上作

南北驅馳報主情  
江花邊月笑平生  
一年三百六十日

多是橫戈馬上行

度梅嶺

溪流百折繞青山  
短髮秋風夕照間  
身入玉門猶是夢  
復從天末出梅關

張元凱

廣陵逢陳郎

竹枝歌罷說離情  
草綠揚州水上城  
憶汝怕逢顏色似  
杏花開處不曾行

阻風

西風吹浪不能平，又阻歸舟一日程。  
正是關河愁絕處，柳條無數作秋聲。

張如蘭

吳門夜泊

夜暗歸雲繞柁牙，江涵星影鴈團沙。  
行人悵望蘇臺柳，曾與吳王埽落花。

陳鶴

吹笛因懷友人

玉笛橫吹入夜分中天華月度流雲  
茗川兩岸春風起飛盡梅花不見君

送張舍人還永嘉

幾年相憶在京畿一遇吳門便拂衣  
君似舟前夜潮水纔臨江口又西歸

真州訪譚子羽

海上尋君路半迷畫船如入武陵溪  
橋迴流出桃花水

應有人家在樹西

詠梅

黃沙萬里塞雲間  
臘盡交河戍未還  
但見梅花飛落盡  
不知羌笛滿關山

寄孫石雲

綠樹青霞畫不分  
水邊書閣淨迎曛  
知君正在山中住  
雨過長生石上雲

郊行漫興



山橋野店酒盈卮  
拄杖無錢欲典衣  
日暮楊花太無緒  
隨風却自渡江飛

雨中寄吳珠川使君

池上花香酒欲醒  
雨添草色上中庭  
與君未踏湖西路  
幾夜春山入夢青

送人還蜀

久遊江國草萋萋  
萬里家山落日迷  
幸有歸心似明月  
今宵先度蜀川西

宿潤州半月再入金陵留別姚麓居道紀

半月齋居道士家  
碧桃千樹吐春霞  
今朝送別江邊市  
馬上停鞭看落花

寄杏臺郎

杏花臺上月華新  
見月長思花下人  
今夜莫孤花月意  
明朝風雨又殘春

花間雜詠

流雲影亂欲凝空  
楊柳絲柔不曳風  
調入春林人不見

乳鶯啼出萬花中

題畫贈姜明府

暮雲春樹路千重  
雪後看山到處同  
夜永燈寒無過客  
月明江色滿樓中

陳第

元夕宿泉州洛陽橋

春風又渡洛陽橋  
柳色青青伴寂寥  
回首故園今夜月  
滿江燈火上寒潮

鄭若庸

代人寄遠

病骨經秋強自持  
寒條飛葉費相思  
可憐陌上垂楊樹  
不似君來繫馬時

衡水離歌

天涯何處客  
愁新濁酒初酣  
欲問津莫道三秋歸計晚  
尊前猶有未歸人

丁小山赴浙東藩幕值余清泉賦別

清秋衛水汎樓船京國逢君已十年漫對綠尊悲白髮  
天涯去住一淒然

徐渭

望夫石

海天萬里渺無窮秋草春花插髯紅自送夫君出門去  
一生長立月明中

武夷山一線天

雙峽凌虛一線通高巔樹果拂雲紅青天萬里知何限

也伴藤蘿鎖峽中

入武夷尋一線天道中述事

花落花開隔水津  
棧梯茅屋總堪憐  
扁舟若不尋歸路  
便是武陵深處人

雪中訪嘉則於寶奎寺之樓居

山徑尋君重復重  
小樓百尺卧元龍  
安窓偏向梅花角  
去映江天雪數峯

扇圖

渺渺平沙四望通  
天涯雙樹立秋風  
畫工不解寒鴉意  
寫入隋堤綠柳中

沈明臣

初梅

欲開未吐半春陰  
無奈江南風雪深  
抱玉含香殊自好  
春閨一片待郎心

送人之南都二首

金陵曾向酒家眠  
十五當壚不數錢  
紅版橋頭明月色

娟娟猶在玉釵前

疎疎秋雨秣陵寒  
白露初高葉未丹  
欲寄愁心無處著  
溼君衫袖到長干

萬歷五年春有獻五色鸚鵡者詔入之恭賦二  
首

日南遙憶隴天長  
丹喙能言五色裳  
玉殿雕籠新詔入  
西宮愁殺雪衣娘

日御文華說五經  
鳥言雖巧未曾聽  
長廊上苑東風裏



寂寂無聲對畫屏

呂生吹笛作此別

倦倚繩牀月上遲  
自將橫竹向予吹  
秋深楊柳不堪折  
況復明朝欲別時

過崑山

桃花楊柳共西灣  
曾唱菱歌帶月還  
春色茫茫今莫問  
滿城烟雨過崑山

柳上

秋深泖上一經過  
蟹舍魚罾處處多  
野屋無烟空綠樹  
夜風天半響寒波

武陵莊

青精作飯紫萸羹  
飽後微吟水上行  
不道空山曾有寺  
隔溪風送午鐘聲

青溪

窈窕青溪盡日尋  
雨收風歇翠沈沈  
一雙燕子翻花出  
始覺人家住隔林

語兒溪

春風來過語兒溪  
野雉低飛麥浪齊  
一片桑麻天氣綠  
養蠶時節鷓鴣啼

王寅

苔金在衡訊歸

秣陵宮樹葉初飛  
客路何人為授衣  
我亦驚秋同海燕  
故鄉端在社前歸

舟過陸州謝鄉人余五郎送酒

新醪香豔石榴花贈得雙尊不用賒為謝客愁消得盡  
殘年一路醉還家

過休陽訪查八十不遇二首

桃李山城未落花懷君來訪聽琵琶定隨年少青錢伴  
何處妖姬賣酒家

年來匹馬走燕雲聽盡琵琶盡讓君白髮紫檀湏自惜  
稀教彈與世人聞

王翹

秋懷

碧天大火未全收一雨空庭帶葉流  
不為無家悲落莫他鄉燕子早知秋

陳淳

聞鳥

重重烟樹鎖招提野客來尋路不迷  
纔過板橋塵土隔落花無數鳥爭啼

彭年

題衡翁扇頭小楷書秋聲賦

碧梧庭院露華清一葉翻堦鶴夢驚  
綠髮方瞳玉堂客  
蠅頭燈下寫秋聲

上元病居篠川存山玉田賓山攜酒妓過訪

銀瓶綠酒挂香車遙過城東宋玉家  
一笑相歡不辭醉  
為憐明月在梅花

對月寄壺梁

天街霜月夜迢迢淮浦金波蕩畫橋  
才子行吟青玉案

仙人吹和紫璫簫

雨後

洞底泉聲谷口聞  
望中峯色杳難分  
欲尋雨後金芝草  
更踏前峯半溼雲

陸治

仕女觀流水小景

銀塘秋水玉娟娟  
霜葉漂紅去渺然  
幾欲題詩寄遼海  
只應流水到君邊

桃花楊柳舞鴨圖

二月吳淞水上灘  
柳絲風急絮漫漫  
詩翁賦罷閒凭處  
花滿春池鬪鴨闌

錢穀

題畫雜花

淡白輕黃各鬪奇  
嫩紅殷紫總芳菲  
上林春色原無賴  
不斷生香惹客衣

居節



春晝

泥春江暖燕來時  
紅白花深桃李枝  
草色一簾門半掩  
卧看雙蝶起遊絲

春寒

春欲分時寒更深  
闌風伏雨晝陰陰  
不通燕子重簾閉  
憔悴花枝病酒心

中甫過齋中烹茗清談試筆寫圖因題其上三  
首

落盡藤花磧水香松風如水晝初長幽人自是山中相  
鶴氅黃冠坐夕陽

蓮社疎鐘報曉晴青山落日映江明一番紅紫春歸後  
新綠如雲繞徑生

滿城車馬看春忙君獨攜琴顧草堂我亦興來扶病坐  
鼠須閒吮墨花香

雪中再送玄掇

金昌西望即天涯寒滿扁舟去路賒瓜步沙頭莫回首

一江風雪似楊花

村居圖

茅簷日暖燕交飛  
雲過牆陰溼翠微  
中酒經旬掩關卧  
蒼苔渾欲上人衣

周天球

鬪雞圖

英年曾入鬪雞場  
金距狸膏事已荒  
惟有雄心忘未得  
披圖猶自問低昂

姚咨

西樓席上聽梨園琵琶戲贈

少年文采復風流  
適意湖山竟日留  
老去不忘歌舞興  
琵琶猶載木蘭舟

周詩

送朱懋道北上

月明愁向此宵多  
執手河梁意若何  
千里雲山青不斷  
片帆何處宿烟波

沈仕

雲厓久客川中江上偶懷

風吹山色不生雲  
日照澄江散綺文  
空憶巴陵三月酒  
鷓鴣啼處一逢君

陸揖

次韻送顧龍山南歸

官河春水送行舟  
君去悠悠不可留  
須信故園春正好  
莫因風雨駐揚州

牟嘉敘

青田溪上

月出高峯潮上灘  
丁寧舟子放舟還  
蒲帆不挂春流急  
又過前溪白鷺灣

岳岱

聽歌

能使新聲入舊詞  
秋風江上夕陽時  
曉來定有花含淚  
莫向尊前唱柳枝

重題華山圖自嘲

覽畫俄驚十四年墨痕山色故依然  
醉鄉蓬島知何處酒量詩懷只似前

山中寄張子言

獨坐空山思五陵丁香花發又逢春  
燈前欲共平生話月落松窓夢故人

秋夜

春日青山看碧桃秋風落葉又江皋  
無端忽作封侯夢

却是牀頭挂寶刀

畫

過雨溪山秋色新  
攜琴還有竹林人  
僧房細繞巖前路  
紅葉隨風打角巾

吳擴

贈水簾周道人

洞鎖千峯紫氣蒸  
峭厓珠瀑亂崩騰  
道人結屋雲深處  
自搗茶油供佛燈



鄭玄撫

湖上贈美人

琵琶新曲轉聲遲  
停棹中流日暮時  
細雨可憐紅袖溼  
愁雲偏惹翠眉垂

邵正巳

宮詞

月轉梧桐夜漸闌  
長門寂寞覺秋寒  
臨風欲奏相思曲  
抱得琵琶不忍彈

吳錦

贈查叟

曾逐鍾生侍武皇  
鵠絃扈從獵長楊  
歸來兩髯紛如雪  
曲曲新聲總斷腸

張鑾

百歲作

石田茅屋野人家  
百番春風換歲華  
盡道長生緣辟穀  
不知香飯有胡麻

顧源

夾蘿峯

紅日纔生陽谷東  
魚龍吹浪曉濛濛  
徜徉笑指三山路  
玉竈銀牀紫霧中

秋行

野菜香粳樂晚年  
疎林晴日好秋天  
風瓢滿耳鳴琴筑  
黃葉深窩得宴眠

范如珪

江上

江上西風雨復晴  
菰蒲深處釣絲輕  
何人隔岸吹長笛  
楊柳秋江一夜生

鄭孔庶

雪後東張碧川

吳橋殘雪漲新痕  
客舍無人閣酒尊  
不為寒梅覓春信  
東風長日不開門

邊習

雨止

訪舊歸來夕照中  
半天涼雨一溪風  
湏臾雨盡浮雲斂  
笑看兒童指蟬螳

張墾

送仲逸同懋功太守遊滇池

滇南西去在天涯  
匹馬先看楚地花  
但有故人嚴僕射  
杜陵隨處即為家

王叔承

宮詞 并序

昔王仲初作宮詞百首乃其後王禹玉擬之蓋仲  
初實與宦官相善而禹玉司北門直故二子寫唐  
宋宮中情景縹緲如畫然風格稍稍降矣夫詞家  
不以多寡為盛衰王少伯古宮詞不數首而穠雅  
俊逸真遺響千春余自華陽禮茅君還月夜入蘭  
陵桃花園適桃花萬樹盛開氤氲花月醉傾流霞  
宛然漢宮春色也余故客遊長安念禁庭事非山

謠所宜則聊掇故宮流澤殘芳竟點染落成此卷  
命姬倚酒歌之回首吾諸王其嚙東家之施者耶  
柳外秋千拂綺樓舞闌初解翠雲裘玉鞭夜踏桃花馬  
萬朶銀燈照打球

別苑東風報牡丹傳宣曉出望春門惜芳却覆黃羅帕  
護取花王待至尊

碧塵縷縷暗香溝湘簟空牀螢火流梧葉一窓眠未得  
月明秋水聽涼州

入宮新拜大長秋歌舞平陽夜不休一曲春聲低按拍  
御前飛墮玉搔頭

敕下天題法曲新書生賦奏太平春雕盤紅裊宮花朵  
賜與傳臚第一人

何處文星動帝廬却憐狗監薦相如漢王親御蓬萊殿  
夜半燒燈讀子虛

綠雲細草溼紅巾御酒傾霞欲醉春試奏教坊新羯鼓  
內園初賽百花神



桃花飛雨膩青隄萬馬驕嘶錦障泥  
袞罷溫泉仙蹕晚  
綵雲狼籍霸陵西

紫燕雙飛花雨香青泥春老墮雕梁  
不知天外烏衣國  
可似宮中別恨長

氤氲水殿蕩朝陽夜漲桃花錦水香  
珍鳥千行看不禁  
自將金彈打鴛鴦

複道冥冥繡戶扃燈花落盡曙烟青  
春寒肯怨鸞衾薄  
暗拂朱簾望小星

六院諸姨獻寶新天家生日幸宜春鳳衫  
嚙熨薔薇露曉近龍牀喜稱身

上巳春回太液池天青水碧晚妝遲一痕初月垂芳樹  
學得纖纖新黛眉

盈盈紅玉曉妝新靜倚菱花自寫真一片青霞生襪底  
滿宮傳是浴妃神

山色移青入畫眉綺疏春旭寄幽思蜀藤新進松花紙  
臨出曹娥江上碑

梨園歌斷萬花天  
風雨寒鈴憶舊筵  
怪得人間傳秘曲  
江南春老李龜年

卿雲縹緲覆長安  
仙仗凌霄頌百官  
芝草忽生涵德殿  
昭儀捧出侍臣看

朝元閣上翠烟橫  
太乙壇前白露明  
曾侍上皇供法曲  
踏歌猶帶步虛聲

詔點伶官又采詩  
譜翻奇調學來遲  
新詞半是龍標尉  
舞向歌前合柘枝

入官猶自服胡麻一尺紅綃寫法華落盡苑花空是色  
藕絲輕履蹋春霞

金山江天閣漫興

揚子橋橫落日明瓜洲天白晚潮生海雲忽到金山寺  
江氣遙吞鐵甕城

鳥外漁歌斷水烟隔江喚過打魚船鮓魚出網鮮猶活  
笑擲船頭三百錢

宿絲溪

鶯啼花落過江南溪上人家盡浴蠶無奈羅敷春欲老  
隔桑紅袖把青藍

二范攜酒過集周野人桂花下看陳生作畫

畫得苕溪歌小山青青蕞桂灑松關春來有酒還招隱  
萬片桃花水一灣

黃姬水

昆陵道中

勞歌江上採江蘼一日愁添髻幾絲借問客心何處折

渡頭燈火落帆時

醉起

山中長日卧烟霞  
車馬無塵靜不譁  
石上酒醒天已暮  
一簾月色覆桐華

虎丘別友人


惜別銜杯過虎丘  
行人無奈亂山愁  
澄江一別秋風裏  
楓葉蘆花是客舟

代賽玉寄沈太玄

去年今日花前別腸斷陽關一曲歌誰解相思情更苦  
思君淚比別君多

御選明詩卷一百九





總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷一百十

詳校官原任主事<sub>臣</sub>李斯咏

欽定四庫全書薈要卷一萬八千六百十

集部

御選明詩卷一百十

七言絕句十

王穉登

種萱

庭下秋風草欲平  
年饑種萱綠陰成  
白花青蔓高於屋  
夜夜寒蟲金石聲

望湖亭

亭邊楊柳水邊花落日行人正憶家不及江南湖上寺  
木蘭舟裏載琵琶

訪董述夫不遇

扣戶無人問四鄰蕭然木榻滿黃塵知君只在長安市  
畫得燕山賣與人

送項仲融遊金陵

長板橋頭聽曲聲徐娘雖老尚多情門前車馬無人問  
自按梁州促柱箏

石頭城下看春潮  
天塹長江萬里遙  
漁人網得沈江鎖  
猶似當年鐵未消

題唐伯虎烹茶圖為喻正之太守三首

太守風流嗜酪奴  
行春常帶煮茶圖  
圖中傲吏依稀似  
紗帽籠頭對竹爐

靈源洞口採旗槍  
五馬來乘穀雨嘗  
從此端明茶譜上  
又添新品綠雲香

伏龍十里盡香風  
正近吾家別墅東  
他日千旄能見訪

休將水厄笑王濛

送舒伯明還太末三首

錄二首

吳江楓樹錦蕭疎千頃寒波翠溼裾若過長橋須艤棹  
青錢不惜買鱸魚

清江白月路迢迢霜落關門柳色凋明歲期君虎丘寺  
相逢先問浙江潮

虎丘寺

橋外行人聽暮鐘寺前楊柳落秋風白公堤上黃花酒

片片青旗山影中

梁辰魚

贈王卿

絳羅袞軟醉榴花  
午夜高樓月倍嘉  
曲罷暗香人不識  
半槽餘煖在琵琶

秦嘉禾

汎湖

汎汎楓湖十里中  
薄雲細浪夜初融  
月明會聽雙龍起

我欲騎之到海東

林兆恩

題室

茫茫天地一閒身  
寄節榕州今幾春  
日暮潮平沙欲合  
隔江還有未歸人

徐韋

重經故居

荒臺欹側柳凋零  
故里重歌悵獨行  
燕子不來花落盡



夕陽偏傍斷橋明

過復元從孫

銀蠟風多護錦屏  
飛觥不逐舞腰停  
當筵莫唱江南曲  
白髮周郎已倦聽

王受甫

題九山壁

一心貪與白雲期  
解帶歸來任所之  
每過名山經月住  
蘇門山上更多時

徐綬

西湖聞笛

月白霜寒客夢醒  
笛聲迴出柳洲亭  
莫教吹過孤山去  
風裏梅花不耐聽

陸文組

美人寄書

秋夢無憑客路遙  
尺書封寄恨迢迢  
吳綾不及桃花紙  
顏色都從別後消

唐汝龍

贈樊三

楊家長矛法入神傳向關西爾獨真萬朶梨花飛月暈  
東吳敵手未逢人

詹斗文

寄張淑

艷舞嬌歌張淑家相思相隔海東涯齊王城下尋常見  
笑折楊枝雪白花

盧澣

宮詞

暖風吹雨點宮衣  
又見桃花滿樹飛  
憶昨未央春睡裏  
桑園蠶屋夢家歸

春日睡起次嘉則

深巷無人靜掩扉  
桃花香暖午風微  
小窗睡起支頤坐  
閒看營巢燕子飛

莫叔明

贈別

年少辭家不畏勞  
山間綠樹戍樓高  
桃花不合潭如淚  
和雨紛紛上客袍

葉權

燕

何幸棲君玳瑁梁  
薔薇花下趁餘香  
願教春色年年在  
不惜雙飛日日忙

聽查八十琵琶

新聲不及鬱輪袍空撥皮絃挂錦絛獨向月明彈一曲  
白頭雙淚落秋濤

張金

古塘即事

布穀聲中日又斜石橋流水兩三家鄉村春色無人管  
開盡棠梨幾樹花

田四科

旅館

旅館清尊日復斜  
鷓鴣啼處客思家  
晚來牆角胭脂雨  
落盡山桃滿樹花

孫七政

春盡日聞鶯

正愁春去對春風  
忽聽鶯啼碧樹叢  
無數飛花向簾幕  
將愁盡入一聲中

黃鳳翔

落花

幾樹桃花次第開  
殘紅零落晚風催  
荒村寂寞無流水  
不惹漁郎認路來

李維禎

送人從軍

煙波江上一扁舟  
萬里辭家耐薄游  
三尺佩刀三寸舌  
丈夫容易取封侯

送吳水部還廬山

秋風秋雨送將歸  
歸後音書莫便稀  
匡阜池頭三石鴈



年年霜落自能飛

沈一貫

閨思二首

菱花初日照人空  
妝罷臨軒數落紅  
不得東風花不發  
花飛猶自怨東風

妾自傷心怨月低  
黃鶯何事亦嬌啼  
不禁含妬將丸打  
定有東風暗向西

于慎行

題忠順夫人畫像

天山獵罷雪漫漫繡袜斜偎七寶鞍  
半醉屠蘇雙頰冷桃花一片殢春寒

夏日過二兄石淙別業同遊洪範東流

谷口花深日欲低水邊村落聽雞啼  
晚山更自多佳氣一帶寒煙暮雨西

題張學士閒雲館

芙蓉江館閉霏微江面閒雲擁釣磯  
春色不勝芳草綠

萋萋長似待人歸

送張洪陽學士請告南旋

長河南下水曾波  
吳楚青山枕上過  
行到潯陽江口望  
應憐秋色故園多

韓世能

送友人南還

垂柳千條拂御溝  
上林春色鳳池頭  
如何張翰多歸興  
不待秋風已倦遊

沈懋孝

北固登望

北固樓前一笛風  
碧雲飛護建康宮  
江南二月多芳草  
春在濛濛細雨中

蔡文範

溪漲發建陽

白日欲沒雲濛濛  
建陽城外雨澆空  
溪邊恠石不知數  
一夜走入洪濤中

張位

懷鄭逸人

雲卧山房秋氣涼  
美人天末隔瀟湘  
堦前別後添幽致  
雨滴芭蕉綠葉長

即事

木落天空萬頃秋  
搗衣聲繫玉關愁  
西風寂歷驚梧井  
卧對銀河月滿樓

林景暘

題美人圖

梧葉西風弄早秋  
美人團扇不禁愁  
平生自恃如花貌  
却下金堦望玉樓

顧大典

閒居雜興

坐來黃葉滿漁磯  
小閣疎燈對掩扉  
竹覆古牆經雨暗  
夜分時復見螢飛

舟夜憶郡齋眺閣

舟移澤國暮煙長望入滄波思渺茫遙憶郡齋清絕處  
萬山孤閣夜焚香

九月十七夜與周國雍話舊

霜滿蒹葭月滿池斷煙疎樹影參差天涯莫道相逢易  
昨歲今宵是別離

梅下吹笛

紅筵綠酒撲寒香樹樹梅花壓粉牆忽見玉鱗飛夜月  
自吹長笛坐胡牀

方沆

次長沙懷賈太傅

楚雲萬里望京華  
賈傅南遷路未賒  
誰料逐臣今更遠  
春風三月過長沙

陳允升

治平山房

朝來風雨正淒淒  
悵望煙波雲樹低  
讀罷離騷閒竚立  
青青蘆葉鷓鴣啼



登縹緲峯觀落照

洞庭一望水空濛  
萬丈高峯俯玉虹  
最是登高奇絕處  
却疑身在白雲中

上林白兔

瑤光冷艷玉瓏璵  
攜得天香下碧空  
為聽雲英呼搗藥  
誤來禁苑曉煙中

雜詠二首

種玉誰家吐雪姿  
偏將幽淡獨稱奇  
武陵樵客應難識

却認殘梅戀故枝

白桃花

輕染鶯黃薄薄裳  
仙風慣學道家裝  
卷舒自合行藏志  
留向秋風取次芳

秋葵

六橋

煙柳霏霏綠樹叢  
六橋春色有無中  
只今夜半西湖月  
一片空明漾玉虹

吳中行

侍班恭紀

鳴柝聲嚴夜未闌  
內家催放侍班官  
玉階縹緲金莖溼  
却憶清遊入廣寒

清輝曙色照樓臺  
繞殿鳴鞭忽訝雷  
黃表一函簾下過  
共看京兆進題來

捲簾引索勢如騫  
扇羽中分列兩邊  
只聽珮環聲隱隱  
不知身在幾重天

散朝回蹕更趨蹒  
步輦傳呼複道長  
轉出殿來還到閣  
却隨仗馬下東廊

史鈞

春晴

春光二月滿皇州  
半逐桃花入水流  
何事王孫歸未得  
東郊芳草自含愁

薛夢雷

發三山

倦遊萬里欲投閒  
未斷塵緣更出關  
七十五程重屈指  
夢魂何處不三山

夜次弋陽

風塵何事只棲棲  
楚水茫茫去鳥低  
落日漸看人影盡  
平沙如雪弋陽谿

馮時可

新柳

驛外津頭雪半消  
芳菲到處著柔條  
輕拖夜影搖流月  
低舞春陰鬪落潮

輕陰昨夜度宮牆  
徐送春風入建章  
何處攀條縈舊恨

有人臨鏡學新妝

乍垂雲葉覆金堤  
日暮牽愁少婦啼  
何日漫天飛絮起  
春風為送五原西

光福即事

柳暗花繁草似煙  
山深地僻水如泉  
櫓聲咿軋空濛裏  
不是漁船是酒船

山尖浮靄微微雨  
水際生風細細漣  
一片春心何處寄  
畫船搖曳杏花邊

白芍藥

庭前麗草日初曛  
姑射肌膚蘭麝芬  
減却鉛華都不御  
春心一片淡如雲

光福同汝滿汎舟

白恰涼生乍欲秋  
攜君湖上泛扁舟  
青山過雨妝螺髻  
綠水涵天漲鴨頭

題岱宗圖

雲根翠律磴千盤  
澗壑淙淙響急湍  
紅日霞扶半夜起

金  
卷一百十  
蒼叢雪積四時寒

秋夜試茶

靜院涼生冷燭花  
風吹翠竹月光華  
悶來無伴傾雲液  
銅葉閒嘗紫筍茶

林章

夜度恨這關

楚水東邊別路多  
秋風夜半動離歌  
迢迢恨這關前月  
獨照行人過汴河



無題

曾從洞口送胡麻一隔山門即海涯自是仙郎忘舊路  
桃花流水不曾差

贈王中軍

將軍意氣似平原三十年間客滿門為道報恩須國士  
得來只是一壺飧

崔季鶯

怕教雪落歌應嬾愁作雲飛舞不輕偷向東風啼柳畔

一行花雨一聲鶯

春日

春城柳色入東華  
莫惜驂騑過酒家  
記得去年江上別  
風吹二十四橋花

渡江

不趁東風不待潮  
渡江十里九停橈  
不知今夜秦淮水  
送到揚州第幾橋

孫繼皋

芙蓉湖

芙蓉湖邊楊柳斜  
家家啼鳥村村花  
水面歌兒搖畫舫  
陌頭游女渡香車

趙南星

寄象先兵部

長安歲晚雪霜頻  
林下應知忘故人  
此日音書那不寄  
銀魚冬筍未嘗新

李化龍

題清苑涇陽驛壁

短牆小屋柳垂垂二十年前此詠詩  
今日重來無覓處  
空餘烏鵲繞寒枝

邢侗

效唐人雜興

秣陵花柳接平橋渡口垂絲隱畫橈  
君且莫歌桃葉曲  
秦淮今夕不通潮

霜風如剪夜颼颼歡去歡來不繫舟  
今日一壺臨古渡

隔河人唱白符鳩

寄訊憨公海印寺

種得霜秔弟子春  
掌中山雀鉢中龍  
諸方衲子歸香積  
可奈齋時一片鐘

寄章廷綸畫史

丹陽郭裏誰憐汝  
汴水亭邊最憶君  
此日謝安團扇上  
無人為畫敬亭雲

送張仲儀

董子園邊放去舟故人牽纜數相留客心已逐花前發  
總聽驪歌不解愁

走筆戲贈萬伯修使君

五花番馬鷓鴣裘夜獵歸來興未休教唱西涼新樂府  
一時霜月徧幽州

鄒迪光

行經舊院

曲房深院草萋萋不見嬌鶯滿樹啼惟有秦淮舊時月

夜深相送板橋西

賦得西湖柳

一種腰肢浥露妍  
湖光占得倍堪憐  
縱然春盡須飄泊  
只在瑤箏錦瑟邊

澄江舟行

夕陽秋色布帆懸  
霜葉霜花送客船  
雨過鳥啼多竹外  
月明人語在沙邊

徐三重

送友掌教射洪

江流欲盡是巴西  
巫峽荆門煙樹迷  
遙望客帆行到處  
亂山斜日子規啼

莫歎青羶作客寒  
聖朝猶是重儒官  
洛中鼎食知多少  
誰似先生苜蓿安

憑闌

瑤臺直上紫雲端  
醉御秋風獨倚闌  
海月漸高霜漸滿  
六銖輕細不知寒



支大綸

信州公署

玉露楓林旅雁寒  
綠蕉分影入雕闌  
自憐兩度來江右  
不是閒官即冷官

沈懋學

署中聞子規

一片愁心託杜鵑  
望中隴樹斷蒼煙  
歸人只是歸難得  
白髮相催又隔年

贈沈孟嘉訪開之湖上

初陽臺上紫雲停  
何處瑤簫入夜聽  
載酒看花歌白苧  
直教明月下西泠

馮琦

送顧實甫年丈還吳

蟬聲處處和  
驪歌風渡漕河起  
夕波獨有故人分手地  
蒹葭秋色暮煙多

杯酒離亭憶舊遊  
歸心別恨不堪秋  
懸知十二天街月

影落三江伴客舟

大通橋汎舟

日影遲遲錦纜開  
檣烏不動燕飛迴  
碧流遠接長天盡  
一片晴波樹杪來

治水別孝與

未能留汝復相留  
治水何如剡曲舟  
記取與君分手處  
水邊修竹雨邊樓

送魏懋忠

擊筑高歌興未孤暫分離恨作歡娛不知後夜相思夢  
得及今朝醉裏無

鄒元標

閒雲館為張洪陽太史賦

亂木蒼蒼落日曛杖藜橋畔自為羣茅亭小構澄江上  
高卧西山一片雲

題鞦山

縹緲爐煙香氣合參差瀑布似珠懸仙人何日乘鸞去

踏破蒼波萬頃煙

送都勻友人

空山梅柳欲催春  
忽報柴門至遠賓  
莫道并州渾忘却  
見君猶似故鄉人

馮夢禎

無題

琉璃研匣鎮隨身  
彩筆揮來字字新  
他日長門如有恨  
千金詞賦不求人

王士性

再宿王將軍石室

萬綠網縕宿野煙江南五月半晴天雙雙燕子逢人語  
引得新雛掠水邊

種竹移花欲滿庭高齋雨過萬山青怪來無事銷長日  
起向松根剷茯苓

陳泰來

客中午日

客裏端陽也自娛呼童沽酒泛菖蒲  
家園咫尺汀蘆外  
艾虎朱絲事事無

楊德政

河西阻風戲示同行者

失路依依獨問津  
楊花飄蕩撲征輪  
東風正似郵亭吏  
只解迎人不送人

吳達可

從友人覓蘭

山村寂寂綠陰移  
每浥蘭芳翠陸離  
長日不禁幽思發  
更從新雨乞新枝

陸懋龍

小院

小院幽陰似井間  
風枝隨地點苔斑  
何時鏟却重簷去  
露出西南一角山

孫成泰

送尤司訓



送君湖上正斜曛  
楚水吳山咫尺分  
今日莫辭杯底醉  
數聲風笛片帆雲

屠隆

燕京即事

玉貌花驄兩鬪輝  
香風如水泛紅衣  
燕姬少小能騎馬  
笑指金鞭踏月歸

送長吉諸孫東還

年來何日不思鄉  
却送君歸欲斷腸  
聞道小園剛半畝

不愁無地種垂楊

紅線詩五首

結束戎裝劔陸離  
月華星彩共低垂  
嚴城秋冷銅焦死  
魂斷三千外宅兒

龍文匕首髻烏蠻  
一霎遙空響珮環  
街鼓未休營卒卧  
滿身風露魏城還

直拂銀河織女機  
天風颯颯泛霞衣  
手持北斗黃金合  
千里關山度若飛

忽離瓊筵下玉階  
湘裙低覆蹋雲鞋  
情知不是人間別  
歌散香銷十二釵

金銀宮闕是儂家  
暫插鸞釵拂髻鴉  
一逐孤雲天外去  
朱門空鎖碧桃花

恭送曇陽大師

列坐搏桑大帝前  
六銖五色照瑤田  
直凌海面行空去  
颯颯天風散紫煙

西池南嶽坐相邀  
髣髴煙中白玉橋  
手炙鸞笙踏雲路

靈音一半入瓊簫

馮大受

迴瀾臺八景

天際帆檣

日落江門霽色開  
拍天帆影入樓臺  
荻蘆兩岸秋風冷  
疑是乘槎河漢來

雙橋彩虹

秋水盈盈迷落日  
石橋兩兩挂長虹  
隔江雨過千門曉

多少晴霞入望中

秋水長天

一抹殘霞澹遠川  
晴光隱隱下長天  
欲知秋色饒何處  
只在迴瀾落照前

滄洲別墅

蕭蕭別館雨餘初  
滿座清風一榻書  
門外何人容載酒  
問奇常過子雲居

綠野平疇

野岸暗侵雲漠漠水村寒意樹蒼蒼夜來若箇隨車雨  
添得新禾幾許長

竹林晚風

落葉蕭蕭弄晚暉香風時啓竹間扉閒來掃石焚香坐  
幽鳥相親不肯飛

九峯爽氣

突兀層臺瞰遠峯半空晴插紫芙蓉貪看爽氣頻登眺  
不覺松間報午鐘

夕陽官渡

谷陽渡口是通津  
花落鶯啼正暮春  
只恐風光留不住  
青青楊柳送行人

龍膺

南歸聞雁

征人家近住瀟湘  
楓葉初丹橘柚黃  
憑爾先將歸信寄  
莫言風雨隔衡陽

姜士昌

春日郊行

金張亭館帝城邊  
北里南鄰競管絃  
山鳥日來遊客醉  
曲池芳草自年年

余寅

張郡博歸海門

一路丹楓送出關  
白雲迢遞滿秋灣  
錢唐千里乘潮去  
看盡吳山看楚山

題四時山水圖四首

錄一首



芳草籠煙復籠霧  
綠陰不斷山如暮  
落花故拂倦遊人  
指點前村問來路

王德新

期登羅陽

羅浮煙雨滿空山  
千仞崖藤尚可攀  
煮石眠雲誰禁得  
律僧翻羨老夫閒

車大任

與臨清武雙溪

十載相逢章水濱與君同醉異鄉春誰知今日清源道  
又是天涯別故人

臧懋循

答汪仲嘉

客路經春侶伴稀故鄉回首淚霑衣不知若箇吹長笛  
一夜梅花似雪飛

章嘉楨

勸農

溪邊千嶂朝含雨竹杪一鳩午喚晴雲漏日明油壁暖  
吏人打鼓勸春耕

張萱

自廣濟至潑水

峭帆斜日挂危檣疊鼓呼風亦太忙却聽舟人話潮信  
欲乘新月汎錢唐

朱國祚

東朝侍直

殿庭香靄接雲平一道爐函夾陛行肅肅講臣齊鵠立  
金蓮影裏喚先生

夜泊淨業寺

僧樓佛火漾空潭李廣橋低積水含一夜朔風喧樹杪  
薊門飛雨徧城南

西湖上

芍藥闌邊花氣收鷗鷁谷口斷雲浮倦遊愛說江鄉事  
先試西湖一葉舟

秋入香山寺

山半松門度石梁  
流泉決決響僧廊  
置身著色屏風裏  
槲葉新紅柿子黃

洪光寺

石門幾曲轉丹梯  
圓殿僧同怖鴿棲  
指點遊人下山路  
酒旗風颭夕陽西

中峯晚望

中官丙舍即花宮  
松柏林前梵磬風  
試向精廬高處望

樓臺金碧夕陽中

摩訶菴觀杏花作

摩訶菴外袖吟鞭  
繁杏春開十里田  
曾與村翁舊相識  
看花不費酒家錢

祕魔厓

祕魔厓仄蘚文斑  
千載盧師去不還  
遺有澄潭二龍子  
日斜歸處雨連山

嘉禧寺

山牆圍作化人城  
榆柳陰濃信客行  
始信精廬風日好  
秋深猶綠牡丹坪

江上夜泊

江上扁舟一葉輕  
夜深燈火滅還明  
枕函未作寒山夢  
卧聽潮聲帶雨來

李廷機

雨霽聞蟬

五雲初霽曙光流  
垂柳千條蔭御溝  
兩岬新蟬啼不住

隔林遙送漢宮秋

葉向高

出關別江仲魚

心知惆悵對離觴  
一望郵亭十里長  
自與江郎黯然別  
馬頭春草是他鄉

鄒德溥

雨霽聞蟬

西山一望隔簾櫳  
柳暗花明御苑東  
斷續蟬聲聽不盡



夕陽人立小亭中

于若瀛

清泉寺

湍谷西風椒葉稀  
穿林片片凍雲飛  
荒原車馬應無數  
閒殺山僧坐翠微

金陵春

晴雲曉壓石城孤  
江樹江煙淡欲無  
南雪未消靈谷寺  
東風先綠莫愁湖

朱長春

西湖夜泛

孤山一半月中明  
橋影浮湖入畫清  
兩岸白沙如雪淨  
獨楊枝下酒船橫

渡錢唐

雪後平江清逼人  
海門帆葉散如蘋  
青山兩岸飛無盡  
一片空明是富春

方應選

徐孟孺陳村圖

春風綠柳角巾斜笑踏清谿醉杏花山犬隔籬遙吠月  
可容雙屐到君家

贈張兼之

鸛裘一醉坐寒風劍氣橫秋曙色空此夜江城留別處  
霜林點點落丹楓

西風颯颯動離羣凍浦回舟首重分此夜渭城聽不足  
亭亭秋思滿江雲

湯顯祖

秀州

雨溼松林春滿煙杏花榆莢映新田不知何處唱歌好  
東柵平湖日夜船

新林浦

凌陽浦里雜花生曉屋鳴鳩春樹晴昨夜南溪足新雨  
轆轤原上踏歌聲

廣陵夜

金燈颭颭夜潮寒樓觀春陰海氣殘  
莫露鄉心與離思  
美人容易曲中彈

寄林已陵

漢西門上月華流澧浦湘君玉珮遊  
借問仙鳬何處遠  
白雲飛滿洞庭秋

平昌青城山

萬仞飛泉挂石龍青城如霧洗芙蓉  
自非仙令鳴琴出  
誰瞰秋窗玉女峯

過曲江

去鴈已開梅嶺雪歸舟猶帶海人煙  
青皋雨過如鋪粉  
曾是韶陽種乳田

再覲回宿龍潭驛

誰向歸舟唱一聲玉蘭花盡牡丹榮  
似憐遊子春三月  
纔換江南第一程

雨蕉

東風吹展半廊青  
數葉芭蕉未擬聽  
記得楚江殘雨後

背燈人語醉初醒

飲來青閣卽事二絕

城南煙色遠萋萋  
高宴城隅日未低  
最是一春寥落處  
秋千斜月畫樓西

東南山色翠逶迤  
日照西陵上酒遲  
看罷秋千微有恨  
不敲方響出紅兒

送余玉簾

一曲蘭舟未敢淹  
月生秋水碧簾纖  
遙知獨夜匡山裏

靜卷爐煙看玉簾

送客湘中

拂檻菱歌餞遠遊  
斷蟬疎雨最宜秋  
思君獨夜夢何處  
斑竹簾西湘水流

官閣

蘭歌滅燭暗逢迎  
檻倚紅梅發豔輕  
半醉卷簾春色裏  
竹廚煨火夜分情

素宏道



明空住柳浪五月附余舟南下別余歸宗道上  
因作柳浪三疊以送之

青池白石每談空銷却銀缸幾炷紅記得柳浪湖上柳  
夜禪愁聽碧絲風

碧溪影裏一僧歸漾得雲光上衲衣記取柳浪湖上水  
縠紋風起鷺鷥飛

石鑪話盡晚窗煙閒別春芽自煮泉記取柳浪湖上月  
隔花呼起放生船

梨花初月夜

梨花疎點貼窗流  
斜月笙簫處處樓  
醉裏不知花是影  
隔紗驚喚小揚州

天壇

仙苑桃花朵朵香  
曾於天上看霓裳  
劉郎老去風情減  
閒把音容問太常

答君御諸作

碧水丹厓不自由  
無因闌入會仙樓  
布帆飽趁瀟湘水

幾處青楓黃葉丹

登嘯臺

青峯如面洗溪紋石上鸞音久不聞  
欲向先生供一匕  
嵩山煙雨華山雲

宿華州公署

古槐修柏琅玕竹曉日晴嵐翡翠山  
疎影半窗鳩忽語  
湘南煙水夢初還

江上

桃花春水滿江頭，獨擁佳人翡翠樓。  
誰抱琵琶江口上，聲聲彈出小梁州。

袁中道

簣簞谷暑中即事

三杯薄醉拂桃笙，一枕風窗夢也清。  
天氣夜涼新浴後，葛蕉紈扇竹中行。

周獻臣

道路憶家園

謝豹啼殘麥燕飛山花伴客送春歸  
家園此日無人賞  
社雨冥濛掩竹扉

王士昌

分宜道中

野菊花黃楓葉丹衝寒日日據征鞍  
擔囊行旅休相訝  
蠻尉於今屬漢官

黃承玄

江上送陸伯生東歸

瓜步洲前歸思濃  
金焦忽送五更鐘  
一帆羨爾乘潮去  
數徧吳山到五茸

王嘉謨

送人之廣陵

遙看海色過橫樓  
萬樹江中送客舟  
月照關山莫辭醉  
明朝風雨廣陵秋

袁黃

潯江夜泊

潯陽江上鷓鴣啼茅屋青燈隔水西  
獨坐孤篷傷往事  
寒鴉飛盡楚天低

徐燭

郵亭殘花

征途微雨動春寒  
片片飛花馬上殘  
試問亭前來往客  
幾人花在故園看

元夕懷李伯賢

往事傷心倍可憐  
故人今夜渺雲天  
燈光月色秋千影

已隔春風二十年

交河道中

黃沙漠漠馬驂驪北地春光久自諳不用塞帷縱遊目  
斷無山色似江南

村中晚步

青山迴合抱青溪村徑陰陰鳥自啼落盡疎林秋色晚  
水流楓葉過橋西

徐勣



過弋陽

頗憶文房舊日題  
餘干水落弋陽溪  
平沙渺渺孤城在  
朝暮猶聞山鳥啼

三月晦日送友人之安南

落花飛絮委東流  
春去行人不可留  
却恨春風已歸去  
豈能吹夢到交州

寄王百穀

吳門別後渺天涯  
千里傳書客路賒  
何日菴前談半偈

一瓶秋水玉蓮花

焦竑

遊仙六章贈陳鍊師

錄五首

曾燕瑤臺十二峯  
酒狂謫下蕊珠宮  
紫霄不厭重來晚  
便拍洪崖駕彩虹

昨夜曾過玉女家  
滿身環珮帶煙霞  
歸時更按遊仙曲  
醉踏層峯弄月華

參山渺渺接天壇  
雲影松聲滿路寒  
欲問高人行道處

花深時聽一鐘殘

古殿陰森山木春  
月明分踏玉階塵  
好同簷下焚香坐  
閒看人間夢裏身

一自尋真入紫微  
醺壇風冷碧桃稀  
冶城亦是仙靈窟  
鸞鶴冥冥更不歸

陶望齡

雪蕉為商叔護賦

綠陰窗外漸看勻  
葉底題詩綵筆新  
恠得秋來未搖落

知君句裏總陽春

風回長袖自郎當  
斜倚幽齋怨夕陽  
莫道柔枝能帶雪  
羅衣偏稱玉為妝

揚州懷開美

秣陵東上又扁舟  
兩地茫茫煙水愁  
此夜雪深江樹暝  
可能無夢到揚州

雙蓮詩二首為童貞奴作

黃鵠歌殘調轉悲  
鴛鴦塚畔夢猶疑  
只應池上雙蓮影

得似當年鏡裏時

雙窺雙語鏡中妝  
蓮葉蓮花總斷腸  
幾倩西風洗紅粉  
斷香零露老秋房

雪巖二首

中夜披衣聊出戶  
無數山雲挂庭樹  
忽然數片飛不還  
已作風前一溪雨

丹壑蒼厓處處鐘  
夜深天畔有孤筇  
寒燈一點踈龕裏  
照見雲間五老峯

董其昌

倣李營丘寒山圖

拈筆經營輞口居  
心知餘習未全除  
莫將枕漱間家具  
又入山中篋裏書

高攀龍

偶成

春來勝事逐時新  
早起風光倍可親  
忽見青天垂柳綠  
此時愛殺樹邊身

陸彥章

雨夜

木葉疎疎燈炮長  
酒醒風雨到匡牀  
明朝西市街頭望  
溪水應添幾尺強

一片秋光逼夜生  
淒涼客思夢還驚  
燭花落盡更籌遠  
惟有寒蟬送雨聲

閉門旬日怯衝泥  
藥隴全荒水拍堤  
迢遞十年鳴佩侶  
五更風雨候朝雞

折岸蓼入供膽瓶

頻年京洛賦羈愁夢寐空懷故國秋江上一枝纔入手  
恰疑身坐白蘋洲

江南秋信著汀花綠葉叢叢簇紫葩遠水疎籬成間闊  
那知相見在天涯

涿水朱華太有情興持杯酒映寒檠過江若與蓴鱸遇  
已讓秋風第一盟

歸次盧龍



帝城東抱海山重迢遞單車出萬峰秋色長天吹白鴈  
歸心落日下盧龍

黃輝

巫夔道中

狂雲也自學朝朝老雪判春未肯銷鴈嘴啄成三角路  
虎牙銜出半邊橋

未曾五里已三溪幾許寒厓挂斷霓亂石累成春雪碓  
斷橋橫作上天梯

星星冷炬拂雲堆  
夜踏偏橋半欲摧  
人隊似猿穿巖去  
犬聲如豹透林來

懸梯東折復西還  
雙磴斜開碧玉關  
不雨不晴天著睡  
冷雲橫出夢中山

入峽書懷


華髮還來照玉溪  
斑衣常是夢中啼  
孱陵尺素何時到  
家立相如客舍西

徐應簧

春夜夢吳心淵文學

昨夜從君歌竹枝  
醒來不記曲中詞  
徘徊獨望西泠岸  
正是潮平月落時

御選明詩卷一百十



總校官庶吉士臣侍朝

校對官編修臣莫瞻菴

謄錄監生臣和其聲